

Священномученик Михаил Тихоницкий

На велицей вечерни

На Господи, воззвах: стихиры на 8, глас 5:

Приидите, вернии,/ новаго первомученика земли Вятския/ песньми боголепными прославим,/ Михаила чуднаго,/ пастыря доброго,/ благочестия поборника,/ веры Православныя защитника и раскола обличителя,/ правды Божия истиннаго проповедника,/ смертью Господа прославившаго,/ и венец славы от Него приимшаго/ и молящагося о спасении душ наших.

Священства дар прием/ и крест свой на рамо возьмем,/ добрый пастырю Михаиле,/ добле во благочестии потрудился еси,/ многия люди во ограду церковную возвратил еси/ и, о гонителях моляся, смерть за Христа смиренно приял еси./ Ныне же, во Обителях Небесных пребывая,/ моли спастися душам нашим.

Терпение безропотное в тебе, отче, показася,/ егда погребению предаде триех чад и супружницу добрую./ Вся сия скорби тяжкия,/ яже со смирением приял еси,/ крепости духа твоего сокрушити не возмогоша,/ понеже сила Божия в немощи совершается./ Темже во страданиях твоих верою укреплялся еси/ и в смерти Бога прославил еси.

Да радуется земля Вятская,/ прославляючи пастыря доброго Михаила,/ иже, во дни нестроений дух мятежный века сего обличая,/ к миру и молитве всех верных призываше/ и о гонителях своих моляшеся./ И ныне Престолу Божию предстоит/ со всеми новомученики и исповедники Церкви Русския/ и прославляет Троицу Живоначальную.

Слава, глас 2:

Приидите, вернии, лик составльше,/ благодарственную песнь Богу принесем,/ даровавшаго нам мученика новаго,/ проповедника истиннаго Божественных словес,/ пастыря доброго стада Христова,/ мученика

добропобеднаго,/ теплаго молитвенника и усерднаго ходатая,/ и с любовью вси возопиим:/ Господи, молитвами угодника Твоего, священномученика Михаила,/ помилуй и спаси души наша.

И ныне, предпразднства.

Вход. Прокимен дне. И чтения 3 мученическая.

На литии стихиры, глас 8:

Процветоша добродетели твоя, священномучениче Михаиле,/ и плод мног принесоша семена учения Христова,/ тобою всеянная в души благочестию прилежащим/ и скверное житие отложившим./ Моли Христа, Преплагаго Бога,/ прощение грехов нам даровати/ и душам нашим спасение.

Раскольники мудрым и кротким словом/ в истинней вере наставляя,/ Православней Церкви послушная чада сотворил еси,/ да не погибнут, но восприимут спасение,/ еже Христос дарова стаду Своему.

Слава, глас 1.

Подобен: О, дивное чудо:

О, дивное чудо!/ Источник радости во граде Орлове явился,/ обретоша бо ся честныя мощи твоя,/ священномучениче Михаиле,/ темже архиереи, священницы и людие православнии благодарственно восклицают:/ слава Богу в Троице Единому,/ подающему миру велию милость.

И ныне, предпразднства.

На стиховне стихиры, глас 1:

Пострадавый Тебе ради, Христе,/ священномученик Михаил/ многия муки претерпе/ и, победный венец на Небесех прием,/ днесь молится о спасении душ наших.

Стих: Священницы Твои облекутся в правду/ и преподобнии Твои возрадуются.

Многи скорби праведным/ и от всех их избавит я Господь./ Ты же, священномучениче Михаиле,/ в лишении чад и супружницы,/ скорби тяжкия

претерпел еси,/ обаче не оскуде вера твоя,/ и стадо, Богом ти данное, добре упасл еси,/ темже поминай любовь твою восхваляющая.

Стих: Блажен муж, бояйся Господа,/ в заповедех Его восхощет зело.

Учительство с непрестанною молитвою сочетав,/ проповедничество же со смирением показав,/ всем житием твоим преподобным отцем уподобился еси./ Ныне же молим тя,/ помози нам, священномучениче прехвальне,/ подвигом добрым подвизаться/ и спасение душам улучшить.

Слава, глас 2:

Прославим ныне, вернии,/ пастыря доброго Михаила,/ смирением украшенного,/ усердне людем послужившаго/ и жизнь свою за Христа положившаго,/ ныне же молящегося о спасении душ наших.

И ныне, предпразднства.

Тропарь, глас 4:

Богоугодному житию поревновав,/ мученическою кровию верность Христу запечатлел еси,/ священномучениче Михаиле,/ моли Всеблагаго Бога нашего,/ да сохранит Церковь и землю Русскую/ от ересей, расколов, мятежа и брани,/ укрепит нас в Православии и единомыслии,/ возниспослет нам милости Своя/ и спасет души наша.

На утрени

По 1-м стихословии седален, глас 4:

Наставления твоя, Михаиле богомудре, всех, слушающих тебе, духовне напиташа и словеса евангельская, усты твоими прореченная, окаменение сердец людских сокрушиша. Мы же молим тя: помози нам крест свой неленостно носить и райскаго селения достигнути.

Слава, и ныне, предпразднства.

По 2-м стихословии седален, глас 1:

Благодатию Духа Святаго просвещаемь, апостольским стопам последовал еси, Михаиле славне, и многия люди во ограду Святыя Церкви привел еси, овцы

стада Христова соделовая.

Слава, и ныне, предпразднства.

Величание:

Величаем тя,/ священномучениче Михаиле,/ и чтим честная страдания твоя,/ яже за Христа/ претерпел еси.

Псалом избранный: Бог нам Прибежище и Сила:

По полиелеи седален, глас 2:

Любовь Христову в сердце своем стяжав, чада твоя к Пастыреначальнику привел еси, отче наш Михаиле. Мы же, мужеству твоему во страданиях дивящиеся, усердно взываем: помози нам Православную веру свято хранить и, взявше крест свой, во след Христа шествовати.

Слава, и ныне, предпразднства.

Степенна, 1-й антифон 4-го гласа. Прокимен, глас 4: Проидохом сквозе огонь и воду/ и извел еси ны в покой. Стих: Разжегл ны еси, якоже разжизается сребро. Всякое дыхание: Евангелие от Матфеа, зачало 36.

По 50-м псалме стихира, глас 6:

Священномучениче отче Михаиле,/ праведно явился житие твое пред лицом Бога Вышняго,/ пастырския бо труды усердно совершая/ и вся скорби тяжкия мужески терпя,/ смерть от рук богоборных смиренно приял еси./ И ныне у Престола Владычня/ вкупе с новомученики Церкви Русския/ молишися о спасении душ наших.

Канон священномученика, глас 3.

Песнь 1

Ирмос: *Воды древле манием Божественным/ во едино сонмище совокупивый/ и разделивый море израильтеским людям,/ Сей Бог наш препрославлен есть,/ Тому единому поим, яко прославися.*

Припев: Священномучениче Михаиле, моли Бога о нас.

Боголюбивою душею твоею, святе Михаиле, ко Господу издетска

прилепился еси, всем сердцем желая Тому послужити и пети Спасу Христу, яко прославися во веки.

Знания различная улучшить желая, неленостне трудился еси и славу Единому Богу воспевал еси: славно бо прославися.

Храм души твоея в чистоте сохранив и многия добродетели стяжав, священномучениче Михаиле, апостольски шествовал еси и стадо Христово умножил еси.

Богородичен: Пресвятая Дево Чистая, руку Свою ко грешным простри, взывающим Ти: спаси ны, Госпоже Милостивая.

Песнь 3

Ирмос: *Иже от не сущих вся Приведый,/ Словом созидаемая,/ совершаемая Духом,/ Вседержителю Вышний,/ в любви Твоей утверди мене.*

Учительство с подвигом сочетавай, пастырь добрый людем земли Вятския явился еси, святе Михаиле, словом и житием твоим пасомыя наставляяй.

Служение в Церкви Божией усердно совершая, о едином на потребу попечение велие прилагал еси, благия части приобщая верных.

Храм Божий созидаая, труды многия ко благоустроению того приложил еси, иже и по ныне зриши суть.

Богородичен: Скорбных утешение и отчаянных спасение, Мати Христа Бога, к Тебе прибегаем и молим: исцели души наша, грехом омраченные.

Седален, глас 1:

Припадем к молитвеннику нашему, Михаилу славному, и испросим помощи духовныя, да возможем воспитати чада наша в вере и благочестии, во еже пагубныя лести им избегати и всем сердцем ко Христу прилеплятися.

Слава, и ныне, предпразднства.

Песнь 4

Ирмос: *Положил еси к нам твердую любовь, Господи:/ Единородного бо Твоего Сына/ за ны на смерть дал еси./ Темже Ти зовем, благодаряще:/ слава силе*

Твоей, Господи.

Попусти Господь испытати твердость веры твоя, егда супруги и чад твоих малых лишился еси. Обаче, печаль твою на Бога возложив, в молитве Тому взывал еси: слава силе Твоей, Господи.

Не токмо отцем, но и материю чадом твоим по плоти был еси, ихже и возрастил еси во благочестии и чистоте; сыны бо твоя во архиерействе Богу послужиша, дщери же людям наставницы добрыя явишася.

Пение похвальное благоговейно приносим ти, святе Михаиле, Бога же, давшего ти крепость, прославляем, взывающе: слава силе Твоей, Господи.

Богородичен: Нескверная Отроковице, чистотою удивившая Ангелы и вся Небесныя Силы; о Тебе, Богоизбранная, радуются вси земнороднии, яко сподобльшейся быти Мати Божия.

Песнь 5

Ирмос: *На земли Невидимый явился еси/ и человеком волею сожил еси, Непостижимый,/ и к Тебе утреннююще,/ воспеваем Тя, Человеколюбче.*

Очистив ум твой и божественными помыслы озарився, священномучениче Михаиле, яко пастырь добрый душу твою за овцы полагал еси.

Милосердный нрав имея, страждущим отец добрый был еси, Михаиле славне, ведый, яко милостивии помиловани будут.

Во всяком человеце образ Божий видя, в темницах заключенныя посещал еси, скорбящих утешая и к познанию воли Божия наставляя.

Богородичен: Всяк недуг врачуеши и отчаянных от погибели спасаеши, благодарение наше приими и скоро на дела благая возстави, Целительнице душ и телес наших.

Песнь 6

Ирмос: *Бездна последняя грехов обыде мя,/ и исчезает дух мой;/ но прострый, Владыко, высокую Твою мышцу,/ яко Петра, мя, Управителю, спаси.*

Паству, яже во Орлове, водами жизни вечныя напоил еси, богоносе

Михаиле, и, яко делатель добрый, в вертограде Христове усердно потрудился еси.

Весть о Христе Воскресшем пастве твоей непрестанно возвещал еси, да вси печаль житейскую превозмогут и радости Небесныя исполнятся.

О славе Божией усердно ревнуя, досточудне Михаиле, в годину гонений любовь ко Господу пламенел еси, зловерие нечестивых мужески посекая.

Богородичен: Унынием мя отягченного и помощи не имущаго от сродник своих, Дево Владычице, не остави, но возведи от тли живот мой.

Кондак, глас 1:

Граду Орлову пастырь добрый/ и Вятстей земли первый новомученик явился еси,/ священномучениче Михаиле,/ Христу подражая, за убивающих тя, молился еси,/ о прощении их ходатайствуя./ И ныне, Престолу Божию предстоя,/ моли о нас непрестанно,/ теплый заступниче и скорый помощниче.

Икос:

Кто возможет исчислити многия труды и болезни твоя, яже ради любве к Богу подъял еси, священномучениче Михаиле? Сего ради восхваляем тя:

Радуйся, чадо своих по плоти в заповедех Божиих ходити научивый;

радуйся, сугубое попечение о чадах церковных приложивый.

Радуйся, кроткий и милостивый нрав имевый;

радуйся, в праведном житии старческих седин достигнувый.

Радуйся, подвигом твоим гонители удививый;

радуйся, смирением высоту добродетелей явивый.

Радуйся, отче Михаиле, теплый наш ходатаю и скорый помощниче.

Песнь 7

Ирмос: *Якоже древле благочестивыя три отроки/ оросил еси в пламени халдейстем,/ светлым Божества огнем и нас озари,/ благословен еси, взывающая,/ Боже отец наших.*

Скорбь и стенание окрест видя, сердцем твоим уязвился еси, отче Михаиле, темже и мужественне прещение святителя Тихона на богохульники пастве твоей

возвестил еси.

Богоотступники, ярости исполненные, заключению ты предаша, ненавидяху бо свет истинного боговедения и не терпяху богоугодного твоего жития.

На судище незаконнем вси ты оправдаша, отче Михаиле, обаче судии гласа людскаго послушати не восхотеша и прещение на ты возложиша.

Богородичен: Скверных игралищем являюся и из рова погибели вопию к Тебе, Пресвятая Владычице: воздвигни мя из пучины греховныя.

Песнь 8

Ирмос: *Нестерпимому огню соединившися,/ Богочестия предстояще, юноши,/ пламенем же невреждени, Божественную песнь пояху:/ благословите, вся дела Господня, Господа/ и превозносите во вся веки.*

Безумнии богоборцы, лжесвидетельства обрести желающе, труды многия прилагаху, да погубят ты и смерти предадут. Ты же во смирении воспевал еси: благословите, вся дела Господня, Господа.

Песни пасхальные воспевая, яко агнец на заклание шествовал еси и, скорбящих о тебе утешая, взывал еси: благословите, вся дела Господня, Господа.

Жене, идущей по тебе и плачущей, рекл еси: возьми ризу мою и чадом возвести, да евангельския заповеди соблюдают и путем Христовым следуют, Бога превозносяще во вся веки.

Богородичен: Помощь всех еси, Всенепорочная, иже верою и любовию песнословят Божественное Твое Рождество, Имже возсия с Небесе свет Божественнаго разума.

Песнь 9

Ирмос: *Новое чудо и Боголепное:/ девическую бо дверь затворенную/ яже проходит Господь,/ наг во входе,/ и плотоносец явился во исходе Бог,/ и пребывает Дверь затворена;/ Сию неизреченно/ яко Богоматерь величаем.*

На убиение влекомый, последнее наставление чадом твоим послал еси, да неленостно заповеди евангельския исполняют.

Дошедшу ти до места смерти твоея, Михаиле священномучениче, благословил еси храмину, идеже немощныя и болящия твоими трудами благоустроил еси, о прощении мучителей Господу моляся.

Егда собор церковный, иже во граде Москве, о убиении твоём извещен бысть, тогда Тихон, Первосвятитель Церкви Русския, сына твоего, епископа Владимира, рыдающа слезне, милостивно утешаше.

Богородичен: Радуйся, Ходатаице спасения человеком и Заступление; радуйся, Красото Церкви и Благолепии; радуйся, Державо и Славо верных. Темже Тя неизреченно, яко Богоматерь, величаем.

Светилен:

Отец сирот и вдов защитник, богатство нищих и болящих утешение, юных просвещение и жезл старости еси, отче Михаиле, теплый наш молитвенник и неустанный пред Богом ходатаю. Моли Милостиваго Бога, да просветит души наша светом Своея благодати.

Слава, и ныне, предпразднства.

На хвалитех стихиры, глас 6:

Дивно и пречудно бысть твое служение, священномучениче Михаиле, непрестанно бо службы совершая, милость Божию на люди привлекал еси, и, словом и житием паству свою наставляя, дело Божие во смирении совершил еси, темже и венец мученический улучил еси, Подвигоположника спасения нашего прославляя.

Сердце твое в мире сем скорбно бысть, ты бо, источая слезы и Богу моляся, жития мирнаго непрестанно просил еси, егоже страдания твоими во Обителях Небесных улучил еси, идеже Господь всяку слезу от очей твоих отъял и радость Небесную тебе дарова.

Не можаху безумнии богоборцы зрети твоего смирения, отче Михаиле, и, руки своя простерше, лютей смерти тя предаша, обаче любовь Небесную убить не возмогоша, яко пребывает во веки, еюже вернии спасаются.

Слава, глас 8:

По страдальчестей кончине твоей/ мнози, скорбию объяти, о сиротстве своем,/ восплакаша и возрыдаша,/ утешения чающе,/ егоже и обретоша в прославлении твоём,/ свящennemучениче прехвальне Михаиле.

И ныне, предпразднства.

На Литургии

Блаженны от канона предпразднства, песнь 3-я и святого, песнь 6-я.

Прокимен, глас 7: Восхвалятся преподобнии во славе/ и возрадуются на ложах своих. Стих: Священницы Твои облекутся в правду, и преподобнии Твои возрадуются. Апостол ко Евреям, зачало 334. Аллилуиа, глас 4: Многи скорби праведным, и от всех их избавит я Господь. Стих: Возваша праведнии и Господь услыша их. Евангелие от Луки, зачало 67. Причастен: В память вечную будет праведник:

Молитва

О, избранниче и угодниче Христов, свящennemучениче Михаиле, Церкви Русския столпе непоколебимый, земли Вятския благое прозябение, сродников твоих предстателю и наставниче!

Ты, от юности во благочестии подвизаяся, добр плод в терпении принесл еси. Егда же призва тя Господь на служение пастырское, тогда добрый делатель вертограда Божия явился еси и, чада своя в вере и доброделании наставляя, многия же души во ограду церковную возвращая, о всех людех теплыя молитвы возносил еси. Во время же гонения безбожнаго во смирении смерть кротко приял еси, за убийц твоих моляся, и в первых новомученицех земли Вятския просиял еси.

Ныне убо призри на нас, недостойных чад твоих, умиленною душею и сокрушенным сердцем тя призывающих. Буди пастырем нашим правило веры, воином вождь духовный, болящим врач изрядный, печальным утешитель, гонимым заступник, юным наставник, всем же благосердый отец и теплый

МОЛИТВЕННИК.

О, святче Божий! Умоли Господа Бога, да соблюдается в вере Православней Отечество наше и в нем достойно и праведно прославляется имя Пресвятыя Троицы, Отца и Сына и Святаго Духа во веки веков. **А**минь.